



Na osnovu člana 15. Zakona o Upravi za indirektno oporezivanje ("Službeni glasnik BiH", broj 89/05) i člana 61. stav 2. Zakona o upravi ("Službeni glasnik BiH", br. 32/02 i 102/09), a radi provođenja carinskih i poreznih oslobođenja iz člana 26. Okvirnog sporazuma između Bosne i Hercegovine i Komisije Evropskih zajednica o pravilima suradnje koja se odnosi na finansijsku pomoć Bosni i Hercegovini u okviru pružanja pomoći putem instrumenta pretpristupne pomoći (IPA) ("Službeni glasnik BiH - Međunarodni ugovori", broj 6/08), a uz suglasnost Delegacije Evropske unije u Bosni i Hercegovini, Ministarstva finansija i trezora Bosne i Hercegovine i Ministarstva vanjske trgovine i ekonomskih odnosa Bosne i Hercegovine, direktor Uprave za indirektno oporezivanje, d o n o s i

## **I N S T R U K C I J U**

**o postupku ostvarivanja carinskih i poreznih oslobođenja u skladu sa Okvirnim sporazumom između Bosne i Hercegovine i Komisije Evropskih zajednica o pravilima suradnje koja se odnosi na finansijsku pomoć Bosni i Hercegovini u okviru pružanja pomoći putem instrumenta pretpristupne pomoći (IPA)**

### **GLAVA I. OPĆE ODREDBE**

#### **Član 1.** (Predmet)

Ovom Instrukcijom propisuje se postupak ostvarivanja prava na oslobođenje od plaćanja uvoznih dažbina i poreza na dodatu vrijednost (u daljnjem tekstu: PDV) pri uvozu, odnosno stavljanju robe u slobodan promet u carinsko područje Bosne i Hercegovine (u daljnjem tekstu: BiH) i oslobođenje od plaćanja PDV-a pri nabavci dobara i usluga u BiH, a u skladu sa članom 26. Okvirnog sporazuma između Bosne i Hercegovine i Komisije Evropskih zajednica o pravilima suradnje koja se odnosi na finansijsku pomoć Bosni i Hercegovini (u daljnjem tekstu: Okvirni sporazum) u okviru pružanja pomoći putem instrumenta pretpristupne pomoći (IPA).

#### **Član 2.** (Ostvarivanje oslobođenja)

Oslobođenje navedeno u članu 1. ove Instrukcije, ostvaruje se pri provođenju ugovora u okviru projekta koji se finansira iz IPA fonda u skladu sa Okvirnim sporazumom.

## **GLAVA II. POSTUPAK OVJERE POTVRDE ZA OSLOBAĐANJE OD PLAĆANJA UVOZNIH DAŽBINA I PDV-a NA ROBU I USLUGE I SPECIFIKACIJE ROBE**

### **Član 3.**

(Postupak ovjere potvrde i specifikacije robe)

(1) Po potpisivanju ugovora u okviru IPA sa Delegacijom Evropske unije u BiH (u daljnjem tekstu: DEU), DEU uručuje ugovaraču prazan primjerak potvrde za oslobađanje od plaćanja uvoznih dažbina i PDV-a pri uvozu robe i za oslobađanje od plaćanja PDV-a pri nabavci dobara i usluga u BiH u okviru projekta koji se finansira iz IPA fonda u skladu sa Okvirnim sporazumom, na obrascu iz Priloga 1. ove Instrukcije (u daljnjem tekstu: Potvrda IPA DEU), zajedno sa detaljnim uputama o proceduri oslobađanja na koje se odnosi uručeni primjerak potvrde.

(2) Ugovarač koji je primio sredstva iz IPA fonda, DEU podnosi popunjenu Potvrdu IPA DEU, na obrascu iz Priloga 1. ove Instrukcije, u tri istovjetna primjerka. Za uvoz robe u okviru projekta koji se finansira iz IPA fonda, ugovarač, pored potvrde, DEU podnosi:

- a) specifikaciju robe koja se uvozi u tri primjerka, koja treba da sadrži podatke o vrsti, količini i vrijednosti robe koja se uvozi, potpis i pečat uvoznika i (ili) isporučioca robe, naziv, ime i pečat krajnjeg korisnika robe, kao i prazan prostor za potpis i pečat nadležnog ministarstva (za ovjeru specifikacije robe prije uvoza robe) i
- b) originalnu izjavu krajnjeg korisnika robe koja se uvozi.

(3) DEU za jedan potpisan ugovor u okviru IPA projekta izdaje jednu Potvrdu IPA DEU, u tri primjerka, kojom potvrđuje da se ugovor realizuje iz sredstava IPA fonda. DEU, na sva tri primjerka te potvrde, unosi kontrolni broj i datum ovjere potvrde, te ih potpisuje i stavlja pečat DEU, nakon čega DEU zadržava jedan primjerak potvrde, a preostala dva primjerka vraća ugovaraču. Kada je u pitanju uvoz robe, DEU zadržava i kopiju specifikacije robe iz uvoza, a sve originalne primjerke specifikacije robe vraća ugovaraču.

(4) Potvrdu za oslobađanje od plaćanja uvoznih dažbina i PDV-a pri uvozu robe i za oslobađanje od plaćanja PDV-a pri nabavci dobara i usluga u BiH u okviru projekta koji se finansira iz IPA fonda, a realizuje po principu "podijeljenog upravljanja" u skladu sa članom 5. stav 2. tačka c) Okvirnog sporazuma, ovjerava i izdaje Ministarstvo finansija i trezora BiH, i to jednu potvrdu za jedan ugovor u okviru navedenog IPA projekta, u tri primjerka, na obrascu iz Priloga 2. ove instrukcije (u daljnjem tekstu: Potvrda IPA MFT).

(5) Ugovarač iz BiH koji je sklopio ugovor o implementaciji projekta iz stava (4) ovog člana Ministarstvu finansija i trezora BiH podnosi popunjenu Potvrdu IPA MFT na obrascu iz Priloga 2. ove Instrukcije, u tri istovjetna primjerka. Za uvoz robe u okviru navedenog projekta koji se finansira iz IPA fonda, ugovarač pored potvrde, Ministarstvu finansija i trezora BiH podnosi:

- a) specifikaciju robe koja se uvozi u tri primjerka, koja treba da sadrži podatke o vrsti, količini i vrijednosti robe koja se uvozi, potpis i pečat uvoznika i (ili) isporučioca robe, naziv, ime i pečat krajnjeg korisnika robe, kao i prazan prostor za potpis i pečat nadležnog ministarstva (za ovjeru specifikacije robe prije uvoza robe) i
- b) originalnu izjavu krajnjeg korisnika robe koja se uvozi.

(6) Ministarstvo finansija i trezora BiH za jedan potpisan ugovor u okviru IPA projekta iz stava (4) ovog člana izdaje jednu Potvrdu IPA MFT u tri primjerka, kojom potvrđuje da se ugovor realizuje iz sredstava IPA fonda. Na osnovu provjere iz ugovorne dokumentacije u Ministarstvu finansija i trezora BiH se na sva tri primjerka te potvrde unosi kontrolni broj i datum ovjere, te se potpisana i ovjerena potvrda vraća ugovaraču u dva primjerka, a Ministarstvo zadržava jedan primjerak potvrde. Kada je u pitanju uvoz robe, Ministarstvo finansija i trezora BiH zadržava i kopiju specifikacije robe iz uvoza, a sve originalne primjerke specifikacije robe vraća ugovaraču.

(7) Specifikaciju robe koja se uvozi po ugovoru u okviru bilo kojeg projekta koji se finansira iz IPA fonda u skladu sa Okvirnim sporazumom, koja treba da sadrži podatke navedene u stavu (2) tačka a) ili stavu (5) tačka a) ovog člana, ovjerava ministarstvo kojem kao resornom ministarstvu pripada krajnji korisnik robe, odnosno korisnik oslobađanja od plaćanja dažbina pri uvozu robe po osnovu projekta u okviru IPA fonda, ili ministarstvo koje je, kao resorno ministarstvo, po bilo kom pitanju, nadležno za područje ili oblast na koju se odnosi projekat u okviru IPA fonda po osnovu kojeg se vrši uvoz robe. U slučaju gdje nema resornog ministarstva, ovjeru specifikacije robe vrši Ministarstvo vanjske trgovine i ekonomskih odnosa BiH o kojoj vodi službenu evidenciju.

#### **Član 4.** (Evidencija i izvještaj)

(1) DEU i Ministarstvo finansija i trezora BiH vode službenu evidenciju o izdatim Potvrdama IPA DEU, odnosno IPA MFT, iz člana 3. stav (3) i stav (6) ove Instrukcije.

(2) DEU i Ministarstvo finansija i trezora BiH će, do 20-tog u mjesecu za prethodni mjesec, Grupi za pružanje usluga poreznim obveznicima u Odsjeku za poreze Regionalnog centra Sarajevo dostavljati mjesečne izvještaje o izdatim Potvrdama IPA DEU i IPA MFT iz člana 3. stav (3) i stav (6) ove Instrukcije koje se odnose na uvoz dobara, odnosno na nabavku dobara i usluga u BiH. Mjesečni izvještaj treba da sadrži sljedeće informacije:

- a) kontrolni broj Potvrde IPA DEU ili Potvrde IPA MFT,
- b) broj, datum i vrijednost potpisanog ugovora iz člana 3. stav (1) ili stav (4) ove instrukcije,
- c) naziv projekta koji se finansira iz IPA fonda,
- d) naziv ugovorača, njegova adresa i identifikacioni broj obveznika indirektnih poreza (ukoliko ga ima),
- e) naziv predstavnika stranog ugovarača i njegov identifikacioni broj obveznika indirektnih poreza,
- f) ukupnu vrijednost dobara ili usluga u KM valuti, bez PDV-a.

### **GLAVA III. OSLOBAĐANJE OD PLAĆANJA UVOZNIH DAŽBINA I PDV-a PRI STAVLJANJU ROBE U SLOBODAN PROMET**

#### **Član 5.** (Oslobađanje od plaćanja uvoznih dažbina i PDV-a)

(1) Roba koja se u okviru projekta koji se finansira iz IPA fonda uvozi i stavlja u slobodan promet u carinsko područje BiH, oslobođena je od plaćanja uvoznih dažbina (carine, carinskog evidentiranja) i PDV-a prema članu 26. stav (2) tačka a) Okvirnog sporazuma.

(2) Lični predmeti i predmeti za domaćinstvo za ličnu upotrebu, koje uvozi fizičko lice (i članovi njegove najuže porodice) koje je angažovano za obavljanje poslova definisanih ugovorom o tehničkoj suradnji, osim fizičkog lica angažovanog lokalno, oslobođeni su od plaćanja uvoznih dažbina (carine, carinskog evidentiranja) i PDV-a prema članu 26. stav (2) tačka d) Okvirnog Sporazuma, s tim da lični predmeti i predmeti za domaćinstvo budu ili ponovo izvezeni ili prodati u državi u skladu sa propisima na snazi u BiH, nakon prestanka ugovora.

(3) Oslobađanje navedeno u stavu (1) i (2) ovog člana ostvaruje se kod carinske ispostave na području BiH kojoj je predočena roba koja je predmet oslobađanja, kod koje ispostave korisnik oslobađanja podnosi sljedeća dokumenta:

- a) za oslobađanje iz stava (1) ovog člana:
  - 1) carinsku prijavu (JCI) za stavljanje odnosne robe u slobodan promet (šifra postupka "4200" u prvoj potpodjeli polja 37), koja se smatra i zahtjevom za oslobađanje,

popunjenu u skladu sa propisima o popunjavanju carinske prijave, te uz upisivanje u drugoj potpodjeli polja 37 carinske prijave šifre "210" (šifra za oslobađanje od plaćanja uvoznih dažbina i PDV-a u okviru IPA prema članu 26. stav (2) tačka a) Okvirnog sporazuma, po Potvrdi IPA DEU) ili šifre "212" (šifra za oslobađanje od plaćanja uvoznih dažbina i PDV-a u okviru IPA prema članu 26. stav (2) tačka a) Okvirnog sporazuma, po Potvrdi IPA MFT), ovisno od situacije,

- 2) Potvrdu IPA DEU ili Potvrdu IPA MTF (ovisno od situacije) izdatu u skladu sa članom 3. ove Instrukcije. Kontrolni broj navedene potvrde mora biti upisan u polju 44 carinske prijave i to uz šifru dokumenta "IPA" i
- 3) specifikaciju robe iz uvoza, na koju se odnosi potvrda iz alineje 2) ove tačke, a koja sadrži podatke i ovjeru navedenu u članu 3. stav (2) tačka a) ove Instrukcije. Specifikacija robe podnosi se u dva originalna primjerka, od kojih jedan primjerak carinska ispostava, nakon ovjere (uz označenje broja i datuma odnosne carinske prijave), vraća korisniku oslobađanja, a drugi zadržava uz carinsku prijavu,

b) za oslobađanje iz stava (2) ovog člana:

- 1) carinsku prijavu za stavljanje odnosne robe u slobodan promet (šifra postupka "4200" u prvoj potpodjeli polja 37), koja se smatra i zahtjevom za oslobađanje, popunjenu u skladu sa propisima o popunjavanju carinske prijave, te uz upisivanje u drugoj potpodjeli polja 37 carinske prijave šifre "211" (šifra za oslobađanje od plaćanja uvoznih dažbina i PDV-a u okviru IPA prema članu 26. stav (2) tačka d) Okvirnog sporazuma), osim za robu koja može biti stavljena u slobodan promet uz oslobađanje od plaćanja uvoznih dažbina i PDV-a na osnovu usmene carinske prijave,
- 2) potvrdu izdatu od DEU, a kojom se potvrđuje da je korisnik navedenog oslobađanja angažovan za obavljanje poslova definiranih ugovorom o tehničkoj suradnji u okviru IPA i
- 3) spisak robe koja se uvozi, potpisan od strane korisnika oslobađanja, u dva primjerka, od kojih jedan primjerak carinska ispostava, nakon ovjere (uz označenje broja i datuma odnosne carinske prijave), vraća korisniku oslobađanja, a drugi zadržava uz carinsku prijavu.

(4) Ako se uvoz robe po osnovu oslobađanja iz stava (1) i (2) ovog člana ne vrši odjednom, nego sukcesivno, za istu se, kod svakog pojedinačnog uvoza, carinska prijava iz stava (3) ovog člana podnosi kod iste carinske ispostave kod koje je prvobitno započet postupak uvoza i oslobađanja. Ta carinska ispostava će pratiti uvoz robe putem sukcesivnog otpisa vrste, količine i vrijednosti robe koja se uvozi po svakoj carinskoj prijavi, uz označenje broja i datuma odnosne carinske prijave, na podnijetoj specifikaciji robe iz uvoza i potvrdi iz stava (3) tačka a) alineja 2) ovog člana, odnosno spisku robe iz stava (3) tačka b) alineja 3) ovog člana.

(5) Odluku o oslobađanju od plaćanja uvoznih dažbina i PDV-a po podnijetoj carinskoj prijavi iz stava (3) ovog člana, carinska ispostava donosi u vidu zabilješke u polju C prijave (npr. "Oslobodeno po čl. 26. stav 1. tačka a) IPA Okvirnog sporazuma" ili "Oslobodeno po čl. 26. stav 1. tačka d) IPA Okvirnog sporazuma", ovisno koja situacija je u pitanju), ako podnijeta carinska prijava i uz nju priložena dokumenta sadrže sve potrebne podatke i zahtjev korisnika oslobađanja se u cjelosti usvaja. Navedenu zabilješku carinska ispostava treba unijeti i u inspekcijski akt odnosne carinske prijave.

(6) Roba iz stava (1) i (2) ovog člana, koja je pri stavljanju u slobodan promet oslobođena od plaćanja uvoznih dažbina i PDV-a, ne smije se koristiti u svrhe različite od svrhe za koje je odobreno navedeno oslobađanje, bez prethodne obavijesti nadležnog carinskog organa i plaćanja uvoznih dažbina i PDV-a od strane korisnika oslobađanja.

## **GLAVA IV. OSLOBAĐANJE OD PDV-a PRI NABAVCI DOBARA I USLUGA U BiH**

### **Član 6.**

(Oslobađanje od plaćanja PDV-a)

(1) U skladu sa članom 26. stav (1) tačka b) Okvirnog sporazuma i članom 29. stav 2. Zakona o porezu na dodatu vrijednost ("Službeni glasnik BiH", br. 9/05, 35/05 i 100/08), isporuka dobara i usluga u BiH po ugovoru u okviru projekta koji se finansira iz IPA fonda u skladu sa Okvirnim sporazumom oslobođena je od plaćanja PDV-a.

(2) Oslobađanje od plaćanja PDV-a navedeno u stavu (1) ovog člana ostvaruje se:

- a) u slučaju isporuke po ugovoru koji je, u okviru projekta koji se finansira iz IPA fonda, zaključen sa DEU - na osnovu Potvrde IPA DEU iz člana 3. stav (3) ove Instrukcije,
- b) u slučaju isporuke po ugovoru u okviru IPA projekta koji se, u skladu sa članom 5. stav 2. tačka c) Okvirnog sporazuma, realizuje po principu "podijeljenog upravljanja" - na osnovu Potvrde IPA MFT iz člana 3. stav (6) ove instrukcije.

### **Član 7.**

(Izdavanje fakture)

(1) Registrovani porezni obveznik - isporučilac dobara i usluga iz člana 6. ove Instrukcije izdaje fakturu bez obračuna PDV-a. Faktura obavezno mora sadržavati i klauzulu: "Oslobođeno od plaćanja PDV-a u skladu sa članom 29. stav 2. Zakona o porezu na dodatu vrijednost - Potvrda IPA DEU ..... (navesti kontrolni broj potvrde) ili Potvrda IPA MTF ..... " (zavisno koja potvrda je u pitanju).

(2) U svrhu iz stava (1) ovog člana, ugovarač je obavezan isporučiocu dobara i usluga predati kopiju odgovarajuće potvrde iz člana 6. stav (2) ove Instrukcije.

## **GLAVA V. PRIJELAZNE I ZAVRŠNE ODREDBE**

### **Član 8.**

(Povrat plaćenog PDV-a)

Ugovarač koji je, prije stupanja na snagu ove Instrukcije, već platio PDV u okviru implementacije projekta koji se finansira iz IPA fonda, a realizuje po principu "podijeljenog upravljanja" u skladu sa članom 5. stav 2. tačka c) Okvirnog sporazuma, plaćeni PDV bit će predmetom povrata u skladu sa članom 29. stav 1. tačka 4. Zakona o porezu na dodatu vrijednost.

### **Član 9.**

(Sastavni dio instrukcije)

Sastavni dio ove Instrukcije su:

- a) Prilog 1. iz člana 3. stav (1) ove Instrukcije - Obrazac potvrde za oslobađanje od plaćanja uvoznih dažbina i PDV-a pri uvozu robe i za oslobađanje od plaćanja PDV-a pri nabavci dobara i usluga u BiH u okviru projekta koji se finansira iz IPA fonda u skladu sa Okvirnim sporazumom (Potvrda IPA DEU) i

- b) Prilog 2. iz člana 3. stav (5) ove Instrukcije - Obrazac potvrde za oslobađanje od plaćanja uvoznih dažbina i PDV-a pri uvozu robe i za oslobađanje od plaćanja PDV- pri nabavci dobara i usluga u BiH u okviru projekta koji se finasira iz IPA fonda a realizuje po principu "podijeljenog upravljanja" u skladu sa Okvirnim sporazumom (Potvrda IPA MFT).

#### **Član 10.**

(Stavljanje propisa van snage)

Stupanjem na snagu ove Instrukcije stavlja se van snage Instrukcija o postupku ostvarivanja carinskih i poreznih oslobađanja u skladu sa Okvirnim sporazumom između Bosne i Hercegovine i Komisije Evropskih zajednica o pravilima suradnje koja se odnosi na finansijsku pomoć Bosni i Hercegovini u okviru pružanja pomoći putem instrumenata pretpristupne pomoći (IPA) ("Službeni glasnik BiH", broj 42/09).

#### **Član 11.**

(Stupanje na snagu)

Ova Instrukcija stupa na snagu osmog dana od dana objavljivanja u "Službenom glasniku BiH".

**Broj: 01-02-2-1675/11**  
**Datum: 25.08.2011. godine**

**V.D.DIREKTOR**  
**mr. sc. MIRO DŽAKULA**